

- 1^r Manchen dunckt / er wer witzig gern
- 2^r Vnd ist eyn ganß doch / hür als vern
- 3^r Dann er keyn zücht / vernunfft / will lern



Narr hur als vern

- 1 Eyn narr ist / der vil güttes hört
- 2 Vnd würt syn wißheyt nit gemört
- 3 Der allzyt bgert erfahren vil
- 4 Vnd sich dar von nit besseren wil

5 Vnd was er sicht will er han ouch
 6 Das man merck / das er sy eyn gouch
 7 Dann das ist aller narren gbrust
 8 Was nuw ist / allzyt doren glust
 9 Vnd hant doch bald vernüwgert dran
 10 Vnd wellen ettwas frömdes han
 11 Eyn narr ist / wer vil land durchfert
 12 Vnd wenig kunst / noch tugend lert
 13 Als ist eyn ganß geflogen vß
 14 Vnd gagack kumbt wider zû huß /
 15 Nit gnüg / das eyner gwäsen sy
 16 Zû Rom / Hierusalem / Pauy
 17 Aber do ettwas geleret han
 18 Das man vernunfft / kunst / wißheyt kan
 19 Das halt ich für eyn wandlen gûtt /
 20 Dann ob voll krützer wer din hûtt
 21 Vnd du künst schissen berlin kleyn
 22 Hielt ich doch nit vff das alleyn
 23 Das du vil land ersüchet hast
 24 Vnd wie eyn kü / on wißheit gast
 25 Dann wandlen ist kein sunder ere
 26 Es sy dann das man sunders ler
 27 Hett Moyses jn Egypten nüt
 28 Vnd Daniel gelert die zyt
 29 Do er was jn Chaldeen landt
 30 Sye weren nit so wol erkant
 31 Mancher kumbt melbig zû der bicht
 32 Der gantz wiß werden meint / vnd lycht
 33 Vnd gat berämt doch wider heyn
 34 Vnd dreyt am hals eyn mülenstein